


ALAHADY faha-5 KAREMY - TAONA D2019



« Izay tsy manam-pahotana aminareo no aoka hitora-bato azy voalohany »

Ry Kristianina havana, efa manakaiky dia akaiky tokoa ny fankalazantsika ny Paka, roa Alahady sisa dia mankalaza ny paka isika ary amin'ny alahady hoavy dia hankalaza ny sampankazo izay mampiditra antsika amin'ny herinandro lehibe, ny herinandro masina. Izao Alahady izao amin'ny toerana maro dia alahady fanaovana pelerinajy izay handinihantsika ny lakroan'i Kristy, miombona amin'I Jesoa amin'ny làlan'ny hazo fijaliana lehibe. Miakatra eny amin'ny la montagne isika manao

Vakiteny I : Iz. 43, 16-21

Tononkira : Sal. 125

Vakiteny II : Fil. 3, 8-14

Evanjely : Jo. 8, 1-11

pelerinajy, entintsika hiakatra ny fiainantsika fa tsy hirefarefa amin'ny tany izay feno lainga sy fitapitaka ary herisetra. Izany rehetra izany no nahafaty an'I Jesoa teo ambony hazofijaliana noho ny etraketrakantsika olombelona, izay no nanolorany ny tenany hamonjena antsika. Mbola manjaka anefa izany, ny zava-misy

amin'ny fiainantsika manambara indraindray fa toa fiainana biby ny fiainantsika olombelona raha mijery zava-misy ankehitriny noho ireny herisetra maro isankarazany, vono olona ireny, fiainana mamofady rentsika etsy sy eroa no manjaka. Mila fihavaozana tokoa isika. Mamakivaky izao karemy izao isika mibanjina ny tenin'Andriamanitra manoro antsika ny làlan-kombana ka hahatonga antsika hibebaka hiala amin'ny fiainana mirefarefa amin'ny tany hiakatra ambonimbony kokoa. Ny pelerinajy any amin'ny "la montagne" dia hanampy antsika hiakatra amin'Andriamanitra, ao anatin'ny fiakarantsika izany no fiantsoana antsika hanavao ny fiainantsika ho Eglizy Olona Velona hivelona ny finoany. Izany finoana izany no ambara antsika amin'ny Paka.

Tsy hoe nofinofy, tsy hoe Andriamanitra lavitra fa eo anivon'ny fiainantsika ny Andriamanintsika. Raha miara-maty amin'i Kristy amin'ny ratsy rehetra isika : ny lainga, ny fitapitaka dia miara-mitsangana aminy hahatonga antsika ho taranaka mpanorina, EOY ka manorina Eglizy Tranon'Andriamanitra. Hampivelatra antsika izany ka hanatsara ny tontolom-piainana izay ifandraisantsika samy isika ao anatin'ny rariny sy ny hitsiny, ao anatin'ny fihavanana hikatsahana ny soa iombonana ka hahatonga fampanandrosoana ny olombelona manodidina antsika sy hahatonga antsika hanana tontolom-pinoana ahafahantsika midera sy mankalaza an'Andriamanitra sy mivelona ny finoana sy ny fiainana andavanandro.

Izany no fotom-pampianarana tian'ny Eglizy anintranterina amintsika amin'izao Alahady faha-5 amin'ny karemy izao ny hananantsika fiainam-baovao. Voalaza ao amin'ny vakiteny voalohany "*Aza mahatsiaro ny zavatra lasa intsony, ary aza mihevitra ny zavatra taloha intsony! Fa indro Aho hanao zava-mahagaga vaovao; efa hiposaka izy izao, tsy hahalala izany va ianareo?*"; Aoka ny lasa ho an'ny lasa fa manomboka amin'izao mba ho zava-baovao tokoa ny fiainantsika, ho zava-boary vaovao. Izany no andrandraintsika amin'izao Paka izao mampiditra antsika amin'ny fiomanana ny kongresy Eokaristika. Mampiombona antsika amin'i Jesoa ny eokaristia, ny tany karakaina dia lasa tany lonaka sy feno rano ary velona, manampy antsika hivelatra tokoa ny eokaristia. Izany no antenaintsika amin'izao fotoana efa akaiky ny paka izao. Md Paoly mizara amintsika ny traikefany ao amin'ny vakiteny faharaoa androany raha nandray an'I Jesoa nandresy ny fahafatesana izy. Izany koa no andrandraintsika amin'izao fanaovantsika ny pelerinajy izao, mba hanao expérience amin'I Jesoa, izy izay nandresy ny ratsy ka mitondra antsika amin'ny fiainam-baovao, izany no mahatonga an'i Md Paoly mizara amintsika ny expérience nahatonga azy nahasahy niteny "*rehefa nahazo an'I Kristy aho dia nataoko fakofako izao rehetra izao*" ny tiany ambara tsy hoe namono tena izy na nanjary tsy nivelona tahaka ny olona rehetra, sanatria izany, nivelona tahaka ny olona izy fa ny fivelomany an'izany rehetra izany dia ao amin'i Kristy, amin'ny alalany ary miaraka aminy, miaraka amin'i Kristy izy, i Kristy nanjary harena ho azy fa tsy ny fitiavan-tena, tsy ny fitapitaka, tsy ny lainga, fa i Kristy no nataony harena. I Kristy harena io no zarainy amin'olona ka nahatonga ny hoe izay manapotika ny harena dia natao fakofako, ka nahatonga azy ho taranaka mpanorina. Izany no làlana ho antsika raha tiantsika ny hanorina tontolom-piainana vaovao miaraka amin'i Kristy. Aoka ho i Kristy no ataontsika ivon'ny fiainantsika sy ny harena amin'ny fiainantsika, amin'ny alalany sy miaraka aminy ary ao aminy no jerena ny manodidina rehetra. I Kristy no référence tsara indrindra. Hirafitra ao amin'I Kristy tokoa anie isika. Milaza koa i Md Paoly "*tsy hoe efa anjely aho na hoe efa lavorary aho fa miezaka aho mba hahatratra izay nahatratrarin'I Jesoa Kristy ahy*". Ho antsika koa ry Kristianina havana amin'izao fiomanana ny Paka izao, tsy hoe lasa anjely isika, tsy hoe ny fahalavorariana, tsy ho tratrantsika fa aoka isika hiezaka hihalavorary mandrakariva, hiala tsikelikely ny ratsy ao amintsika, hiezaka isika. Rehefa kivy isika na miezaka aza tsy miova dia lasa ratsy koa isika, ny ezaka ataontsika ampian'ny fahasoavan'Andriamanitra, izany no mahatonga hoe tsy isika fa ny fahasoavan'Andriamanitra miaraka amintsika. Tsy miasa ny fahasovan'Andriamanitra raha tsy miaraka amintsika.

Tian'i Jesoa ampianarina antsika ao amin'ny evanjely mikasika ny tantaran'ilay vehivavy mijangajanga, isika olombelona rehetra tsara ho fantantsika fa ao anatin'ny fahotana isika ka aoka ho voalohany indrindra tsy hifampitsara isika fa samy mpanota, izany no tian'i Jesoa ampianarina antsika. Jesoa tsy nilaza hoe tsara ny fahotana raha niteny izy hoe "*izay tsy nanota taminareo aoka*

hitora-bato”, I Jesoa tsy manaiky izany, ny fahotana dia ratsy mandrakariva fa mandray ny mpanota izy, izany ny fampianarana ho antsika.

Na manao akory ny toetrantsika dia vonona mandrakariva Andriamanitra mandray antsika, izany no nataon’i Jesoa tamin’ily vehivavy mijanganjanga, isika rehetra dia mpanota ka aoka isika hanatona an’i Jesoa milaza amintsika izy hoe “ *izaho koa tsy manameloka anao, mandehana ka aza manonta intsony*”. Amin’izao herinandro faharoa mialoha ny Paka izao, manàtona ny sakramentan’ny fampihavanana isika, raiso i Jesoa na dia inona ny toetrantsika satria tsy manameloka antsika izy fa manameloka ny fahotana araka ny voalazany hoe “ *mandehana ka aza manota intsony* ” izany hoe mandeha amin’ny fiainam-baovao, hiroso amin’ny Paka isika ho tonga génération de bâtisseurs, manorina tontolo iainana vaovao, manorina tontolom-piainana vaovao sy tontolom-pinoana vaovao hahatonga antsika ho fanasina amin’ireo manodidina antsika ka hampiakatra ny fiainantsika isika, hihavao ao amin’Andriamanitra, hihatsara ao amin’Andriamanitra mandavorary ny fiainantsika ao amin’Andriamanitra, fiainana misy an’Andriamanitra ka amin’ny alalany sy miaraka aminy ary ao aminy no hanorenantsika ny fiainantsika. Na dia eo aza ny manodidina, ataontsika fakofako ireny fiainana ratsy ireny, fiainana misy lainga, misy vandivandy, fiainana feno fitiavan-tena, fiainana avonavona, fiainana fialonana ireny fa fiainana anjakan’ny rariny sy ny hitsiny, fiainana anatin’ny fifankatiavana sy fihavanana ary fiainana hikatsaka mandrakariva ny soa iombonana ka hampivoatra ny olona manontolo ao amin’i Kristy. Amen

Mompera Arsevka Benjamin Ramaroson